

Pisortanut akiitsut akilersinniarneqartarnerat pillugu Namminersorlutik Oqartussat nalunaarutaat

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaat nr. 3, 2. maj 1996-imeersumi §§ 11, 11 a, imm. 8, 11 b, imm. 1 aamma 5, 11 c, imm. 3, aamma 12 b tunngavigalugit, Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allanngortinneqarneranik Inatsisartut inatsisaat nr. 13, 15. november 2007-imi kingullermik allanngortinneqartumi aammalu Aningaasarsianit akileraarutit pillugit Inatsisartut inatsisaat nr. 12, 2. november 2006-imeersumi, § 101, imm. 8 naapertorlugu makku aalajangersarneqarput:

Kapitali 1

Akiligassanik tunniussineq utertitsinerlu

§ 1. Kalaallit Nunaanni pisassaqtut pisassatik akilersinniagassat akileraaruseriffiup piumasaqaatai malillugit qarasaasiakkut tunniuttassavaat, akileraaruseriffiup immersugassiai il.il. naapertorlugit, ajornannginnerusumik nalunaarsorlugillu suliarisinnaaniassammagit, taamaattorli takuuk imm. 2.
Imm. 2. Pisassaqtut pisinnaatitaaffeqartut meeqqanut akilersuutit annertusisat imaluunniit aapparmutakilersuutit akiliisitsiniartarfimmut tunniunnerani akileraaruseriffiup ilusiligaat immersugassat atorineqassapput.
Imm. 3. Pisassat akilersinniarneqarnissaat siunertaralugu suliasap akileraaruseriffimmut tunniunneqarnerani paasissutissat uppersaataillu suut ilanngullugit tunniunneqassanersut akileraaruseriffiup aalajangissavaa.
Imm. 4. Akileraaruseriffik pisassanik akilersinniagassanik tigusiumanngissinnaavoq piumasaqaatit imm. 1 aamma 2-mi allaqqasut tunngavigalugit eqquuttinneqanngippata imaluunniit aalajangersakkat imm. 3 naapertorlugu naammasineqanngippata. Itigartitsinnginnermi pisassaqqartoq qinnuigineqassaaq akileraaruseriffiup piffissaliussaata iluani kukkussutaasimasut amigaatillu iluarseqqullugit.

§ 2. Kommunit pisassaqtut kingusinnerpaamik ulloq akiliiffissaq ullut 14-it missaanik qaangerpagit akiliisitseqqussut ingerlateqqissavaa, tamanna sioqqullugu akiliinissamik kinguartitsinissamik, naafferartumilluunniit akilersuinissamik isumaqatigiittoqarsimangippat.
Imm. 2. Namminersorlutik Oqartussat Naatsorsuutit Pillugit Quppersagaanni malitassiami aalajangersakkat naapertorlugit akiliisitsiniartarnerit tunniunneqartassapput.
Imm. 3. Ineqarnermut, kiassarnermut, innaallagissamut imermullu akiligassat akileraartarfimmut ingerlateqqinnginneranni akiitsulik akiligassaanik ikinnerpaamik marloriarlugu allakkanik eqqaasitsissutinik nassinneqassaaq.

§ 3. Akileeqqusinerup akileraaruseriffimmut tunniunneqareernerata kingorna pisassaqartoq akiligassaq pillugu allamik iliuuseqaqqissanngilaq.

Imm. 2. Pisassaqartoq akiitsunik akilersinniagassatut tunniunneqartunut tamakkiisunik ilaannakortumilluunniit akiitsulimmik akiliiffigineqaruni erngerluni akiliutit akileraaruseriffimmut ingerlateqqissavai.

Imm. 3. Pisassaqartoq akiitsulimmut kinguartitsinissamik naafferartumilluunniit akilersuinissamik, imaluunniit pisassaqartoq akitsunut suliakkiutigineqarsimasunut tamakkiisumik ilaannulluunniit akiliutinik nuussinissamut kissaateqarpat, akileraaruseriffimmut akileeqqusineq tamaat ilaannaaluunniit uterteqqusinnaavaa.

Imm. 4. Akiligassat akilersinniaqqusat tamakkiisut ilaannaalluunniit utertinniarneqarpata paasissutissat makku ilanngunneqassapput:

- 1) Akiitsullip aqqa
- 2) Akiitsullip CPR-nr.-a, imalt. GER-nr.-a
- 3) Akileeqqusinerup akileraaruseriffimmut isumagisassanngortinnerani ulloq
- 4) Akileeqqusissutit sorlermiinneri suunerilu
- 5) Avataaneersup suliamut normorititaa
- 6) Akiligassat qanoq annertutigineri, erniarititat akiligassanullu tapiliussat
- 7) Utertiseqqusineruput peqquataasoq

Imm. 5. Utertitsinissamut qinnuteqaatip itigartitsissutigineranut akileraaruseriffimmit tunngavilersorneqassaaq.

§ 4. Akileraaruseriffik qaammammut ataasiarluni akiliutigineqarsimasunik akiligassaqarfigineqartumut isumannaarinnittassaaq, taamaattoorli takuuk imm. 2. Nassiussinerup akiitsullit, akileeqqusissutit il.il. qanoq agguataarsimanerat paasissutissatut ilanngullugit nassiunneqassapput.

Imm. 2. Meeqqanut akilersuutit annertusisat imaluunniit aapparissamut akilersuutinik pisartagaqartussaasut akiliutigineqarsimasunik ingerlaavartumik isumannaarinniffigineqartassapput.

Imm. 3. Marsip qaammataata naanerani akileraaruseriffik ukiumi qaangiuttumi naatsorsuutinik pisassaqartoq nassittassavaa.

Kapitali 2

Pilersaaruseriffik

§ 5. Akileraaruseriffup naliliinera naapertorlugu akiitsulik pissakilliorluni ineqarnermut inuuniarnermullu naammaannartunik aningaasaateqarpat akiligassanik kinguartitsisoqarsinnaavoq.

Imm. 2. Pissutsit immikkut illuinnartut nalaanneqarnerisigut akileraaruseriffik akiligassanik kinguartitsigallarsinnaavoq.

Imm. 3. Akiitsulik, akileraaruseriffimmut suliasanngortinneqarsimasunik arlalinnut akiligassaqarpat aalajangiiffigineqarsinnaavoq akiligassat sorliit kinguartinneqassanersut.

Imm. 4. Imm. 1 aamma imm. 2. tunngavigalugit akiligassanik kinguartitsisoqarsimagaluarpalluunniit akileraaruseriffik akiitsullip pigisaanik qularnaveeqqutitut sillimasiussisinnavoq tunillugillu, akiligassanut ilanngaatilugit, pisinnaatitaaffianik tigusiinnut akiliisillugu il.il., akiligassanik kinguartitsineruput

atatillugu tamanna ilisimatitsissutigineqarsimappat.

Imm. 5. Akiligassanik kinguartitsigallarnek atorunnaassaaq akiitsullip aningaasaqarnera pitsanngorpat, paasineqarpalluunniit akiligassanik kinguartitsiniarnerup akuerineqarnerata nalaani akileraaruseriffik paasissutissanik sukumiisunik peqarsimanngitsoq. Akileraaruseriffik akiitsulimmut kinguartitsigallarnerup atorunnaarneranik allakkatigut nalunaaruteqassaaq.

§ 6. Akiitsulik, akileraaruseriffimmut suliassanngortinneqarsimasunik arlalinnut akiligassaqarpat naafferartumik akilersuinissamut isumaqatigiissut akiligassanut sorlernut akilersuinissaq aalajangiivigineqarsinnaavoq.

Imm. 2. Akiitsulik isumaqatigiissutit malillugit naafferartumik akilersuigaluarpalluunniit akileraaruseriffik akiitsullip pigisaanik qularnaveeqqutitut sillimmasiussisinnaavoq tunillugillu, akiligassanut ilanngaatilugit, pisinnaatitaaffimmik tigusinikkut akiliisillugu il.il., isumaqatigiissummut atatillugu tamanna ilisimatitsissutigineqarsimappat.

§ 7. Suliat akiliisinnaajunnaarnermut, akuerineqartariaqartumik isumaqatigiissuteqarnermut, akiitsunik isumakkeerinninnermut, ingerlatsisinnaajunnaarnermi isumannaarinninnermut, toqusup pigisaanik isumaginninnermut assigisaannullu attuumassuteqartut isumaqatigiissusiornikkut akileraaruseriffiup, akiitsunut sulit akileraaruseriffimmut isumagisassanngortinneqanngitsunik pisassaqtup soqutigisai sinnerlugit akileraaruseriffik iliuuseqarsinnaatitaavoq.

§ 8. Nalunaarutit, ilisimatitsissutit, eqqaasitsissutit, aggeqqusissutit, aalajangiinerit imaluunniit allakkatigut atassuteqarneq il.il. akileraaruseriffimmit isumagineqarsimasut atsiornertaqanngitsumik, maskiinamilluunniit atsiornikkut eqqartuussinerni inuup nammineq uppersaalluni atsiornertuulli atorineqarsinnaapput.

Kapitali 3

Ernialersuineq

§ 9. Akiligassat akileraarutitut tunngasut, akilersinniaqqullugit isumagisassanngortinneqareersimasut tunniunneqareersimasullu qaammatip tulluup aallaqqaataanit 1 % - imik ernialerneqartassapput, siornatigullu ernialiunneqarsimasut sulit akilerneqarsimanngitsut ernialerneqaqqissanngillat.

Imm. 2. Namminersorlutik Oqartussanut ESU aqqutigalugu atukkanut ernialersukkanut akiitsorilikkat akileqqusaareersullu qaammatip tulluup aallaqqaataanit tamakkiisumik ukiumut 4 % -inik ernialerneqartassapput. Qaammatikkaartumik ernialiisoqartassaaq. Erniat, aningaasartuutit assigisaallu ilanngunnagit pisassarpiat erniaat naatsorsorneqassapput.

Imm. 3. Ilinniagaqarnermi Landskarsimit taarsigassarsiat akilersinniaqqullugit isumagisassanngortitat ukiumut tamakkiisumik ernialerneqartassapput, diskonto-p tamatigut pisortatigoortup nalingata qaavatigut 1 % - imik ilaneqartassapput. Erniat qaammatikkaartumik ilanngunneqartassapput. Erniat pisassarisat nalingi, ernialiissutigineqareersut, aningaasartuutit, assigisaallu ilanngunnagit naatsorsorneqartassapput.

Imm. 4. Ilinniagaqarnermut eqqunngitsumik tiguneqarsimasut akilersinniaqqullugillu, isumagisassanngortinneqarnerisa kingorna qaammatit aallartinneri tamaasa tamakkiisumik ukiumut 6 %-

inik ernialerneqartassapput, diskonto-p tamatigut pisortatigoortup nalingata qaavatigut. Erniat qaammatikkaartumik ilanngunneqartassapput. Erniat pisassarisat nalingi, ernialiissutigineqareersut, aningaasartuutit, assigisaallu ilanngunnagit naatsorsorneqartassapput.

Imm. 5. Immikkoortuni 1-imiit 4-mut allaqqasut qaammammi akiligassat akilerneqarfianni ernialiisoqassanngilaq.

Kapitel 4

Pinngitsaaliisummik naammassisitsineq

§ 10. Pinngitsaaliisummik akiliisitsiniartoqartinnagu akiliisitsiniartartup akiitsulik, akiitsulilluunniit sinnerlugu isumaginnittoq nammineq kajumissuseqarluni akileeqqoqqaassavaa.

§ 11. Akiliisitsiniartartup pinngitsaaliisummik akiliisitsiniarneq kinguartissinnaavaa, makkuninnga peqquteqarpat

1) akiliisitsiniarnerup suliarinerata inerneriumaagassaa eqqartuussinermi allaffissornikkulluunniit suliarineranut sunniuteqassappat, imaluunniit

2) allanik immikkut ittunik peqqutissaqarpat

Imm. 2. Pisassaqtartup pinngitsaaliisummik akiliisitsiniarnerup kinguartinneqarnissaa pissutissaqarluni eqqarsarnartoqartippagu, akiliisitsiniartartup taarsiullugu pigisanik qularnaveeqqutitut sillimmasiussisoqassasoq piumasarisinnaavaa pisassaqtartumullu piumasarlugu imaluunniit aalajangiisoqassasoq pigisanik qularnaveeqqusiussanik pinngitsaaliisummik tuniniaasoqassanngitsoq aalajangiineq aalajangersimasoq pitinnagu imaluunniit piffissaliussimasap qaangiutinnginnerani. Piffissaliussaq sivitsorneqarsinnaavoq.

§ 12. Pinngitsaaliisummik akiliisitsiniarnermi suliaq aallarteqqinneqarsinnaavoq illuatungeriit isumaqatigiissuteqarnerisigut, akiliisitsiniartartulluunniit pisariaqarsorippagu, pingaartumik makku peqqutaatinneqarpat

1) akiligassalik inulluunniit alla pigisanik qularnaveeqqutitut sillimmasiussineq atorunnaarseqqullugu piumasaqarpat inuup allap pisinnaatitaaffinut akerliunera peqqutigalugu,

2) qularnaveeqqutitut sillimmasiussanik pisassalik tunniussinissamik aalajangiinermik nutaamik, inissiigallarnermik nakkutilliinermilluunniit piumasaqarpat,

3) pinngitsaaliisummik akiliisitsiniarnermi akiligassalik peqataasimanngippat, akiligassallu eqqartuussisarnermi inatsisit kapitel 7, §§ 8, imm. 1, 10, imaluunniit 21, imm. 3 tunngavigalugit pisinnaatitaaffini piumasarippagit

4) pisut assigiinngitsut pissutigalugit pigisanik qularnaveeqqutitut sillimmasiussinerup atorunnaarsinneqarnera akiitsulimmit aalajangiiffigeqqullugu kissaatigineqarpat, eqqartuussinikkulluunniit pinngitsaaliisummik naammassisitsineq atorunnaarsinneqarpat, atorsinnaanngitsutulluunniit nalilerneqarpat.

§ 13. Akiliisitsiniartartup pinngitsaaliisummik naammassisitsinera pisussaaqataasumit imaluunniit inummit allamit itigartinneqarsinnaanngitsumik akerlerineqarpat akiliisitsiniartartup pinngitsaaliisummik naammassisitseqquneqarnini unitsillugu suliassaq eqqartuussivimmut suliassanngortissavaa.

Taamatuttaaq pisoqassaaq akiliisitsiniartartuq isumaqarpat pinngitsaaliisummik naammassitsiniaanermut tunngavigisaq nalorninassutitaqarsimappat. Suliassaq eqqartuussivimmuut suliassanngortinneqassaaq akiliisitsiniartartup akerliliissut tunuartikkaluarpaguluunniit.

Pigisanik qularnaveeqqutitut sillimmasiussineq

§ 14. Akiligassat akilersinniarlugit arsaarinnissutinik suliaqartoqassatillugu akiliisitsiniartartup piffissaliussaq pillugu sumilu ingerlanneqassanersoq akiligassalik sapinngisamik nalunaarfigissavaa. Nalunaarutiginninneq aviisitigut pissaaq, imm. 3 tunngavigalugu, imaluunniit akiligassalik pinngitsaaliisummik akiliisitsiniarnermi najuutitinnerani, imm. 4 tunngavigalugu.

Imm. 2. Akiliisitsiniartartup isumaalliorsorinartinnippagu akiitsulik nalunaarfigeqqaarnagu pinngitsaaliisummik akiliisitsiniarneq ingerlassinnaavaa, akiitsullip akileraarutigivallaarsimasaminik siusinaartumik utertitsivigineqarnissaminut allakkatigut qinnuteqarnerminut atatillugu, pinngitsaaliisummik akiliisitsiniarneq siumoortumik nalunaaruteqaqqaarani ingerlanneqarsinnaasoq akuersissutigisimappagu, imaluunniit nalilerneqarpat akiligassanut matusissutissat pissarsiarineqarsinnaaneranut annertuumik innarliisinnaasoq. Peqqutaasumut kingullermut tunngatillugu peqqutigineqartoq akiliisitsiniartartup allattaavianut allanneqassaaq, akiliisitsiniartartullu pisassaartup siusinnerusukkuq qularnaveeqqusiusai naammassitsissutigineqassat piumasarisinnaavaa.

Imm. 3. Aviisitigut nalunaaruteqartoqarsinnaavoq akileeqqusissutip piffissaq eqqorlugu akilernerqarfissaa aatsaat qaangiutereerpat, pinngitsaaliisummillu akiliisitsiniarnissaq aatsaat pisinnaavoq nalunaaruteqarnermit ullut arfineq marluk qaangiunnerisigut.

Imm. 4. Piffissaliussat pineqartut naapertorlugit akiliisitsiniartartup akiitsulik pinngitsaaliisummik akiliisitsiniarnermi najuuteqqusinnaavaa illoqarfimmi nunaqarfimmiluunniit akiliisitsiniarfiusussami najugaqarpat, suliffuteqarpalluunniit. Pinngitsaaliisummik akiliisitsiniarnissaq akiliisitsiniartartup suliffiata avataani pissappat akiliisitsiniarnissaq qaqugu sumilu pissanersoq akiliisitsiniartartup pilersarusiorneranut naapertuuttumik pilersarusiorneqassaaq. Aggersaanermi akiitsullip nammineerluni ornigunnissaa piumasarineqarsinnaavoq. Agginngitsoornerup kingunerisinnaasai aggersaanermut atatillugu paasissutissatut ilanngunneqassapput.

Imm. 5. Akiligassalik peqatigiiffuppat, suliffeqarfiuppat, taakkunungaluunniit assingusuuppat, peqatigiiffup suliffeqarfulluunniit pisortaa, pisariaqassappallu peqatigiiffimmi siulersuisuni ilaasortaq maleruagassat siuliani taaneqartut naapertorlugit aggeqquneqarsinnaavoq, peqatigiiffik suliffeqarfulluunniit illoqarfimmi nunaqarfimmiluunniit inuussutissarsiornermik ingerlatsiviusumiippat, aggersarneqarsinnaavoq.

Imm. 6. Pinngitsaaliisummik akiliisitsiniarnermi akiliisitsiniartartup akiligassaqaqfigineqartup najuunniissaa pisariaqarsoriguniuk aggersarsinnaavaa. Agginngitsoornerup kingunerisinnaasai aggersaanermut atatillugu paasissutissatut ilanngunneqassapput. Akiligassaqaqfigineqartoq peqataanngitsoorpat akiliisitsiniartartup suliassaq itigartitsissutigisinnaavaa.

Imm. 7. Akiligassat akilersinniarlugit arsaarinnissutinik suliaqarnermi akiliisitsiniartartuq uppernarsaasussamik najuutitaqartitsisinnaavoq.

§ 15. Akiitsulik agginngitsooraluarpat, pissarsiarineqarsinnaanngikkaluarpalluunniit pinngitsaaliisummik akiliisitsiniartoqarsinnaavoq. Akiliisitsiniartartulli allaffiani taamaallaat pigisanik qularnaveeqqutitut

sillimmasiussisoqarsinnaavoq, qularnaaveeqqutitut sillimmasiussat akiligassallip pigigai qulaarnaarneqarsinnaappat.

Imm. 2. Pinngitsaaliisummik akiliisitsiniarnermi akiitsulik agginngitsuussagalarpat, pissarsiarineqarsinnaanngippalluunniit akiitsulimmut aappaq, inooqat, inulluunniit 18-it sinnerlugit ukiulik, akiitsullillu akiitsuinik ilisimasaqartoq, pinngitsaaliisummik akiliisitsiniarnerup nalaani isumaginneqqullugit peqquneqassapput.

Imm. 3. Akiitsullip pinngitsaaliisummik akiliisitsiniarnermi najuunnissaa akiliisitsiniartartup piumasarippagu suliaq kinguartinneqarsinnaavoq.

§ 16. Pigisat qularnaveeqqutitut sillimmasiunneqartut akiliisitsiniartartup allattaavimminut allassavai. Naliliisoqarpat nalingi nalunaarsorneqassapput.

Imm. 2. Akiliisitsiniartartup akiitsulik pigisanik qularnaveeqqutitut sillimmasiussinerup inatsisitigut atugassarititaasut pillugit ilisimatissavaa, tassunga ilanngullugit akiitsulik akuerisaanngitsumik pigisanik qularnaveeqqutitut sillimmasiussanik tigumiaqarpat, arsaarinnissutinik pisassalimmut ajoqutaasinnaasumik iliuuseqarsimaneq pinerlussimasutut pineqaatissinneqarsinnaavoq. Akiitsulik najuutinnngippat, akiitsulik sinnerlugu najuuttut allakkatigut oqaasiinnakkulluunniit ilisimatinneqassapput.

§ 17. Pinngitsaaliisummik tunisineq Kalaallit Nunaanni eqqartuussisarnermik inatsit naapertorlugu ingerlanneqassaaq.

Akissarsianik ilanngaasarneq

§ 18. Aningaasarsianik ilanngaassisalernissaa akileraaruseriffiup akiitsulimmut allakkatigut siumut ilisimatitsissutigissavaa. Ilisimatitsinermi ilanngaassinissami procentit qassit, aningaasat qanoq amerlatigisut, ilanngaassisarnissap naatsorsornerani procentit qassit imaluunniit aningaasat qanoq amerlatigisut ilanngaatineqartassanersut aalajangernerani aningaasarsiallu suut toqqammaviusimanersut ilisimatitsissutigineqassapput. Taakku saniasigut isertitanut tunngasut aningaasarsianit ilanngaassisalernerup siorna kingornaluunniit, siumut aammaarluni ilisimatitseqqinnerup kingorna ilanngaassisarnermi procentit ilanngaatineqartussat, aningaasalluunniit ilanngaatineqartussat amerlassusaasa allanngortinneqarsinnaaneri akileraaruseriffiup ilisimatitsissutigissavai. Aningaasarsianik ilanngaassisalernissamut atatillugu akileraaruseriffiup ilimasaarinerminut allakkamini siumoortumik missingersuusiornissamut immersugassaaq akiitsulimmut nassiutissavaa ilisimatitsissutigalugulu, akiitsullillu immersugassaaq immersoriarlugu utertissinnaaga ilisimatitsissutigineqassaaq, paasissutissallu nassiunneqartut akiligassallip akissarsiaanit ilanngaassinissami procentit qassit imaluunniit qanoq annertutigisumik ilanngaasarnissamut aalajangernermi atorineqarnissaat ilisimatitsissutigineqassaaq. Akiitsulik siumoortumik missingersuusiornissamut immersuinissaminut ullunik 14-inik periarfissinneqassaaq.

Imm. 2. Akiitsullip siumoortumik missingersuusiornissamut immersugassaaq nassiutinnngippagu siumut nalunaaruteqarneq naapertorlugu aningaasarsianik ilanngaassisarneq aallartinneqarsinnaavoq. Akileraaruseriffiup aalajangiineq akiitsulimmut piaartumik nalunaarutigissavaa. Nalunaaruteqarneq allakkatigut pissaaq, akiitsorisallu suuneri, qanorlu annertutigineri nalunaarutigineqassapput.

Imm. 3. Akiitsulik inuit allattorsimaffianni nalunaarsorneqarsimanngippat sumilu najugaqarnerminik,

allamulluunniit nassitsiviusinnaasumik ilisimatitsinnigippat, aningaasarsianik ilanngaassisalernissaq siumut ilisimatitseqqaarani aallartinneqarsinnaavoq.

Imm. 4. Akiitsullip siumoortumik missingersuusiornissamut immersugassaq nassiuppagu, akissarsianillu ilanngaasarneq aallartinneqarpat, akileraaruseriffiup naliliinera naapertorlugu akiitsulik pissakilliorluni ineqarnermut inuuniarnermullu naammaannartunik atugaqarluni inuusinnaanera qulakkiissavaa. Naliliinerup paasinarsisippagu akiliisinnaassuseqanngitsoq akiligassanik kinguartitsigallartoqarsinnaavoq takuuk § 5.

Imm. 5. Akileraaruseriffik akiligassamik akilersinniagassamik tigusaqarpat akiitsullillu taassuma saniatigut akissarsiamigut ilanngaanneqartarluni akilersugaqarpat, akileraaruseriffik siumut nalunaaruteqaaqqaarani akissarsianik ilanngaasinnaavoq, ilanngaassinissami procenti imaluunniit aningaasat akiliutigineqartartut qaffanneqanngipata.

Imm. 6. Akileraaruseriffik aalajangiisinnaavoq ilanngaassinissami procenti imaluunniit aningaasat qassit ilanngaatigineqartassanersut allanngortillugit, akiitsullip aningaasatigut inissisimanera allannguuteqarpat. Ilanngaatigineqartartup procentia imaluunniit aningaasat ilanngaatigineqartussat qaffanneqarpata akileraaruseriffiup imm. 1-imi ilisimatitsinermi piumasaqaatit malissavai.

Imm. 7. Akileraaruseriffik naliliissaaq akiitsulik pissakilliorluni ineqarnermut inuuniarnermullu naammaannartunik atugaqarluni inuusinnaanini qulakkeerneqaqqulugu qinnuteqarpat, akiitsullip aningaasaqarnikkut atugarisami allanngorluinnarnerisa kingunerisaanik.

§ 19. Unerartitsisussaaitap kingusinnerpaamik qaammatip ulluisa qulinganni, qaammatip unerartitsiviup siuliani akissarsiat ilanngaatisimasani akileraaruseriffimmut nalunaarutigissavai. Qaammatisiutit malillugit ullut qulingat arfininngorneruppat, sapaataappat imaluunniit nalliuttuuppat piffissarititap kingulleq ulluinnarmut siullermut kinguartinneqassaaq.

Imm. 2. Akissarsianit ilanngaait unerartinneqarneri ilutigalugu akileraaruseriffimmut ingerlateqqinneqartassapput. Taanna ilutigalugu unerartitsisussaaitap akiitsulik allakkatigut imaluunniit tusagassiutit atuarneqarsinnaasut arlaat aqqutigalugu, aningaasat unerartitat annertussusaat nalunaarutigissavaa. Aningaasat unerartitat qaammatip unerartitsiviup tulliaata aallaqqaataanut akiligassanngortinneqassapput. Piffissaatillugu ulloq akiliiffissaq kingulleq tassaassaaq qaammatip akiliiffissap ulluisa 20-at. Qaammatip ulluisa 20-at arfininngorneruppat, sapaataappat nalliuttuuppalluunniit kingusinnerpaamik nalunaarfissaq ulluinnarmut siullermut kinguartinneqassaaq.

Imm. 3. Unerartitsisussaaitap akileraaruteqaataasussat A-t pillugit akileraartartunut 20-nut amerlanerusunulluunniit qaammammut unerartitsiviusumut nalunaaruteqaatissani, akissarsiat ilanngaatigineqartut pillugit qarasaasiakkut nalunaarutigisassavai. Nalunaarutit akileraaruseriffiup immersugassiatut sanaavi il.il. atorlugit tunniunneqassapput taakkulu akileraaruseriffiup nalunaarsuinnermut maleruagassiai malillugit akiitsullit ataasiakkaarlugit paasissutissat tamaasa ilanngullugit akileraaruseriffimmut tunniunneqassapput.

Imm. 4. Akileraaruseriffiup unerartitsisussaaitap peqqusinnaavaa akileraaruteqaataasussat A-t pillugit qaammami unerartitsiviusumi nalunaaruteqartarnissaa akileraartartunik 20-it inorlugit sulisoqarpat, akissarsiat ilanngaatigineqartut qarasaasiakkut nalunaarutigineqartassapput, paasissutissat qarasaasiami pigineqarpata unerartitsisussaaitarlu qarasaasiaq atorlugu internetsimut atuinissaminut periarfissaqarpat.

Imm. 5. Unerartitsisussaaitat akissarsiat ilanngaait pillugit qarasaasiakkut nalunaaruteqartussaannngitsut

akileraaruseriffiup immersugassiai atorlugit nalunaaruteqartassapput. Nalunaarut akileraaruseriffiup nalunaarsuinnermut maleruagassiai malillugit akiitsullit ataasiakkaarlugit paasissutissat tamaasa ilanngullugit akileraaruseriffimmut tunniunneqassapput.

Imm. 6. Akissarsianik ilanngaannermi nalunaarutitut naatsorsuinnermi tunngaviit unerartitsisussaaitamit ukiup unerartitsiviusup qaangiunnerata kingorna minnerpaamik ukiut tallimat toqqortarissavai.

§ 20. Unerartitsisussaaitap akiitsulik sulisorinngikkuniuk, suliunnaarsimappalluunniit, aningaasalluunniit unerartitat unippata ullut tallimat qaangiutsinnagit unerartitsisumit akileraaruseriffimmut nalunaarutigineqassaaq.

Imm. 2. Unerartitsisussaaitap qinnuigineqarnini naapertorlugu paasissutissat akiitsullip suliffeqarneranut aningaasaqarneranullu tunngasut unerartitsinissamut attuumassuteqartut tamaasa akileraaruseriffimmut tunniutissavai. Akissuteqarneq qinnuiginninnerup kingorna ullut 14-it qaangiutsinnagit tunniunneqassaaq.

Kapitali 5

Pineqaatissiissutit atorluersitsinerlu

Pineqaatissiissutit

§ 21. Kinaluunniit piaaraluni, mianersuaalliorujussuarluniluunniit §§-inik 19 aamma 20-imik unioqqutitsisut akiliisussanngortinneqarsinnaavoq.

Imm. 2. Imm. 1-imi taaneqartut arlaat aktienik piginneqatigiiffimmit, piginneqataassuteqarluni ingerlatseqatigiiffimmit, piginneqatigiilluni ingerlatseqatigiiffimmit, peqatigiiffimmit, pisortat allaluunniit pigisaat imminut ingerlattumit, aningaasaateqarfimmit taamaaqataanilluunniit unioqqutinneqarpata inatsisitigut pisinnaatitaasoq pisussaataasorlu akiliisussanngortinneqarsinnaavoq. Namminersorlutik Oqartussat, kommunit imaluunniit Kommunit Kattuffiat unioqqutitsisuusimappata, Namminersorlutik Oqartussat, kommunalbestyrelsi imaluunniit Kommunit Kattuffiat akiliisussanngortinneqarsinnaapput.

Atortuulersitsineq

§ 22. Nalunaarut ullormi nalunaarutigineqarnerani atortuulersinneqarpoq. (*)

Imm. 2. Ilutigalugu, pisortanut akiitsut pantefogedenit akilersinniarneqartarnerat pillugu Namminersornerullutik Oqartussat nalunaarutaat nr. 10, 18. juni 2004-meersoq atorunnaarpoq.

Namminersorlutik Oqartussat, ulloq 1. juli 2010

Palle Christiansen

/

Jan H. Lynge-Pedersen

(* 5. juli 2010 saqqummiunneqartoq)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut